



Gabinete Wever - Croes II

ISLA ((•)) NLINE

Diahuebs 21 April 2022

Email: IslaOnline@gobierno.aw Tel: 528-4952

NOTICIA DI GOBIERNO



20
22

AÑA DI
INVERSION Y
OPORTUNIDAD



ISA LO TENE ACTIVIDAD PA CONSCIENTISA Y PROMOVE "DIA MUNDIAL DI CREATIVIDAD Y INNOVACION"

Den cuadro di "Dia Mundial di Creatividad y Innovacion", Gobierno di Aruba conhuntamente cu Futura, ta anuncia un iniciativa creativo y innovativo cu lo bira realidad den e simannan venidero.

aki pa un causa sumamente importante. Tambe ta gradici y International School of Aruba y Plastic Beach Party pa e iniciativa bunita aki en conexion cu Dia Mundial di Creatividad y Innovacion.

TRASHION FASHION SHOW

Trashion Fashion Show ta un evento innovativo y creativo organisa pa International School of Aruba (ISA). E evento aki tin e meta pa conscientisa e comunidad riba e posibilidadnan pa recicla desperdicio den un manera creativo. Ta trata akinan di un Fashion Show den cual e participantenan lo bay modela y demostra diferente traha creativo cu a wordo traha y construi uzando diferente obheto y artefactonan cu den prome instante por wordo mira manera sushi y desperdicio, pero cu en realidad por wordo recicla pa traha obranan unico.

E evento lo tuma luga riba diabierna 29 di april, cuminsando di 5:00 PM te cu 7:00 PM na Internacional School of Aruba. Participacion ta posibel pa hobennan di 6-14 aña di edad cu registra a traves di e pagina: isatrashionfashion.com. Pa publico en general, entrada ta costa 2 florin pa persona, y tur e fondonan cu ta wordo colecta lo bay pa Plastic Beach Party pa contribui na e esfuersonan di conscientisacion riba e tema di desperdicio y reciclahe, especialmente na Aruba. Pa mas informacion tocante e iniciativa di Plastic Beach Party, bishita www.plasticbeachparty.com.

Den nomber di Gobierno di Aruba, Promer Minister Evelyn Wever-Croes ta haci un invitacion special na nos hobennan, y comunidad di Aruba en general pa participa y/of atende e evento



DON'T TRASH IT, FASH IT!

Trashion Fashion Show

Date: April 29th

Time: 5pm - 7pm

Location: International School of Aruba



SCAN ME

Premier Evelyn Wever - Croes y Futura ta informa: TECH LAB COLEGIO SAGRADO CURASON PRONTO UN REALIDAD

Despues di esfuersonan extensivo y trabounan haci door di e cuerpo di Maestro-/Maestranan na Colegio Sagrado Curason, a keda confirma cu dentro di poco lo tin un Tech Lab nobo na Colegio Sagrado Curason!

E meta di e Tech Lab aki ta pa stimula innovacion, creatividad y exploracion den e estudiante y maestronan. Pa yega na e Tech Lab aki, den e fase inicial lo converti un espacio actual den un Lab cu colornan vibrante, ekipa cu diferente tecnologia, 'gadgets', Virtual Reality (VR) equipment, y mucho mas.

Colegio Sagrado Curason, cu a haci ture trabounan preparatorio hunto cu Aruba Futura Foundation, cu ta colaborando den e iniciativa aki, ta cla pa ekipa y lansa e Lab aki den e lunanan venidero den su prome fase. Trabounan ta andando caba pa converti e espacio aki, y den esaki kier a gradici y alabes aplaudi e cuerpo di maestro/maestranan cu den nan tempo liber ta trahando y literalmente construyendo esaki.

Gobierno di Aruba, Colegio Sagrado Curason, y Aruba Futura Foundation ta haci un yamado tambe na comunidad en general, comercio, y cualkier persona of instancia cu kier contribui na

engrandece e Tech Lab aki den e proximo fase, pa contact libremente: ruzischka.tromp@skoa.aw, nadia.maduro@skoa.aw, of hello@futuralab.org pa cualkier informacion.

Idealmente, den un proximo fase, lo sigui ekipa e Tech Lab haciendo esaki uno mas grandi y habri pa otro scolnan, unda cu maestronan tambe por bishita y explora un ambiente diferente unda cu innovacion y exploracion ta central den e actividadnan.

Un biaha mas palabranan di elogio na e cuerpo di maestro-/maestranan di Colegio Sagrado Curason, y muy en especialmente Ruzischka Tromp y Nadia Maduro, cu a haci esaki un realidad a traves di nan esfuersonan, perseverancia, y vision. Keda pendiente pa mas informacion, y tambe e prome imagennan di e Tech Lab aki!

Prome Minister Evelyn Wever-Croes, den nomber di Gobierno di Aruba ta felicita Colegio Sagrado Curason cu e Tech Lab nobo y ta desea nan exito den stimula innovacion, creatividad y exploracion pa cada alumno di e scol por ta miho prepara den futuro pa loke ta trata e mundo di tecnologia.





A DUNA UN PRESENTACIONNA RIBA PROYECTONAN DI BABY BEACH Y RODGERS BEACH



Diahuebs mainta Minister di Turismo y Salud Publico Sr. Dangui Oduber tabata presente na Nicolas store na San Nicolas. Aki e mandatario a duna un presentacion amplio na gremionan, entre otro San Nicolas Business Association (SNBA) riba e proyectonan di Baby Beach fase 2 y Rodgers Beach cu ta un plan integral cu yama Masterplan Seroe Colorado.

E proyectonan aki ta bay eleva henter e area rond di e dos playanan aki teniendo na cuenta cu nos naturalesa creando asina un desaroyo di embeyesimento di e area na un manera sostenibel y segun nos ley di ROPV. E fondonan cu lo wordo uza pa haci e proyectonan aki ta bin di etre otro Aruba Tourism Authority (ATA), Tourism Product Enhancement Fund (TPEF) y Gobierno, asina minister oduber a trece dilanti.

E proyecto di Baby Beach fase 1 ya caba a keda entrega aña pasa y awor ta den preparacion pa e comienso fase 2 di e proyecto aki. E fase 2 di proyecto di Baby beach ta planea pa termina e aña aki y dentro di poco lo tuma lugar e parti di destaho publico di e proyecto aki. Den fase 2 di e proyecto lo bay hala e "turtle wall" di e beach mas atras pa di e manera aki amplia e beach, poniendo mas santo blanco.

Otro proyecto cu ta finalisando mas tarda fin di mei ta e proyecto di renobacion di e trapi na Rodgers Beach. E trapi aki ta un punto di acceso hopi importante pa Rodgers Beach mirando tur e cambionan cu henter e area aki lo bay conoce ora cu e proyecto keda finalisa.

Rodgers Beach lo bay haya un area di parkeo completamente nobo mescos ta e caso pa Baby Beach tambe. Tur dos area lo

bay haya facilidadnan caminda hende por bay compra cuminda y/of bebida y tambe lo tin bañonan publico pa tur bishitante. Ta bay bin facilidadnan caminda por practica "beach sport" manera beach tennis y beach volleyball.

Minister Oduber a crea un comision di proyecto infrastructural di turismo cu ta keda lidera pa Ministerio di Turismo. E comision aki lo bay traha mas di serca cu DIP y DOW pa asina e maneho cu a keda crea pa cu e beach nan wordo implementa. E desaroyo aki ta uno sostenibel. Pesey a dicidi tambe cu den e proyecto aki lo bay planta hopi palma di coco pa crea sombra pa asina limita e contruccion di palapa ariba e beach.


Turismo ta e driver di nos economia y pesei su desaroyo ta keda un prioridad. E gobierno aki ta para pa turismo di calidad, e turista cu ta bin pa gasta placa y contrubui na nos economia. Pa e motibo aki ta bay bin cu un boutique hotel di 40 camber den e area aki segun e mandatario.

Ta hopi importante pa sigui inverti den e producto Aruba. E proyectonan aki ta bay trece mas actividad economico pa San Nicolas. Minister Oduber tin un compromiso cu San Nicolas bisando cu San Nicolas tin tur e potencial pa haya su fair share den e desaroyo di pais Aruba.




Continuacion A DUNA UN PRESENTACIONNA RIBA PROYECTONAN....

Seroe Colorado Master Plan 3D Area Rendering



Seroe Colorado Master Plan 3D Area Rendering





MINISTER ENDY CROES HUNTO CU EKIPO DI FUTURA A REUNI RIBA PROYECTONAN INNOVATIVO PA ENSEÑANSA PA AÑA ESCOLAR 2022-2023

Cu posibilidad pa nos hobennan sigi explora conocimiento den mundo di tecnologia



FUTURA desde 2018 te awor a tuma varios iniciativa den pa tecnologianan moderno brindando primordialmente e posibilidad na nos hobennan den enseñansa pa explora conocimiento cu e mundo di innovacion aki.

Asina FUTURA a logra cristalisa diferente proyectonan piloto den e mundo digital manera tecnologianan nobo den diferente klas unda a aloca 'C-Touch screens' na Cacique Macuarima School, Pastoor Kranwinkel y St. Franciscus College y Mobiel Techlab maneha pa Metabolic Foundation. Mobiel Techlab por ehempel a wordo sostene cu fondonan di EU na inicio pa 18 luna largo y despues Gobierno y Futura a tuma esaki over te momento Pandemia a bati na nos porta y hopi actividad a wordo poni 'on hold'.

Diamars ultimo Minister Endy Croes a reuni cu representantenan

di FUTURA sra. Jefryene Dijkhoff y sr. Pancho Croes kendenan a presenta un idea piloto pa aña escolar binidero. Ta trata di proyectonan di digitalisacion manera E-learning unda scolnan lo participa y entrega nan proyecto cu nan kier desaroya pa nan scol y/of klas a traves di un 'projectplan'. Pa cu esaki tin un panel di expertonan kendenan lo scoge e proyectonan ganado pa cada kwartaal. Scolnan lo haya mas splicacion y detaye di kico tur nan mester cumpli cune prome cu entrega nan 'projectplan' pa asina nan por bin na remarca pa logra gana y ricibi un inversion pa nan proyecto di E-learning.

Minister di Enseñansa y Deporte Endy Croes a splica hunto cu Minister President sra. Evelyn Wever – Croes y su Ministerio den colaboracion estrecho cu FUTURA ta sostene ideanan pa proyectonan piloto unda FUTURA ta aloca 400 mil florin pa e proyectonan aki. Cada kwartaal un averahe di 100 mil florin lo wordo inverti na proyectonan ganador cuminsando e aña escolar 2022-2023. Den simannan nos dilanti lo reuni cu tur 'stakeholders' y directivanan di scol pa asina inicia cu e proyecto aki. Den conferencia di prensa lo elabora mas extenso riba esaki. Cu creatividad ta logrando hopi pa enseñansa.



MINISTER ENDY CROES A REUNI CU DIRECTORA DI BIBLIOTECA NACIONAL ARUBA (BNA)

Na unda a trata diferente topiconan di importancia pa cu enseñansa



Recientemente Minister Endy Croes a reuni cu di directora di Biblioteca Nacional Aruba, sra. Astrid Britten unda a dialoga riba diferente topiconan di importancia entre otro; a duna un 'update' di e airconan na Biblioteca Nacional Aruba como tambe a elabora riba renobacion di kozijn, portanan y dak di edificio den su totalidad cu ta den necesidad.

Durante e reunion a trata e mocion di Parlamentario di Hulandes Jorien Wuite cu a entrega un mocion pa stimula muchanan lesa unda a sugeri pa haci biblioteca completamente gratis pa muchanan bou di 18 aña. E mocion aki a stimula Minister Endy Croes pa pensa den e direccion pa sostene e mocion. Na luga cu tin cu paga pa aña lo haci esaki gratis pa asina motiva e muchanan pa lesa.

Na final di e encuentro sra. Britten a haci entrega ne mandatario di un invitacion pa apertura di e simposio cual tema di e aña

2022 ta 'Circular Economy'. Sustainable Education Symposium ta forma un parti integral di e proyecto di Educacion Sostenibel di Biblioteca Nacional Aruba. E meta di e simposio educativo ta pa conscientisa estudiante-, maestronan y publico general como tambe pa muestra e practicanan y iniciativanan cu tin riba e tereno di sostenibilidad. Y di e forma aki aporta na un Aruba sostenibel pa futuro generacion y tambe aporta den realisacion di e Sustainable Development Goals (SDG') di Nacionnan Uni.

E programa di e '10th Sustainable Education Symposium' lo continua riba dianan 25, 26, 28 y 29 di april na e filial di biblioteca na San Nicolas. Dialuna dia 25 di april lo inicia un proyecto 'Boekstart' pa muchanan di 0 pa 4 aña "Bo baby su buki", e material ta bin for di Koninklijke Bibliotheek Hulanda. Pa finalisa Minister Endy Croes a expresa cu e tabata un bon reunion, hopi amplio y ta gradici sra. Britten pa su bishita.

2022 | AÑA DI
INVERSION Y
OPORTUNIDAD

Construi riba bo metanan
y inverti den bo mes y pa bo mes,
ta crea oportunidadnan grandi
pa logra progreso personal
cu lo crea oportunidad pa logra
progreso di bo famia y di bo pais.